

## DIA OL PREN BILONG WOK MISIN!

Mipela i amamas long salim dispela niusleta No. 64 long yupela ol kongrigesen. Yupela ol misin diken i ken makim sampela bratasusa long ritim ol ripot long taim bilong lotu long Sande long 31 Disemba, 2017. Ofa long dispela Sande i go long sapatim wok misin. Tenkyu tru long prea bilong yupela ol bratasusa i harim ol dispela ripot.

### Adres bilong salim mani:

EBC Overseas Mission  
BSP Goroka Branch  
No. 1000 751 861

### Ol Fild Adres:

**Mike Kaire**  
EBC Community Service  
P.O. Box 250, Dili, East Timor  
Mobile: (00) 670 77757402  
Email: mikekaire@ymail.com

### Sifu Family

STT BMW Papua  
Nabire 98802  
HP: 0852-1357-0016/  
0812-48620-831  
Phone: (+628) 124 8620831  
Email: sifuutina11@gmail.com

### Missions Mobiliser

Muko Aveo  
missions.mobiliser.ebc@gmail.com  
Mobile: 72681881

### Liklik nius long EBC Wok Misin

Design & Printing by:  
EBC Publications Department, Lae

Dia ol bratasusa,

Mipela i amamas tru long bringim sampela moa nius long wok misin long yupela.

Prea em i wanpela strong bilong mekim olgeta kain wok bilong God.

*Olsem na Pita i stap long haus kalabus, na ol soldia i was long em. Tasol oltaim ol manmeri bilong sios i wok long beten strong long God, bai God i ken helpim em. Na wantu ensel bilong Bikpela i kamap, na lait i kamap insait long haus kalabus. Na ensel i paitim banis bilong Pita na i kirapim em, na i tok, "Yu kirap kwik." Na tupela sen i lus long han bilong Pita na i pundaun long graun. Na ensel i tok, "Pasim let na putim su," na Pita i mekim olsem. Na ensel i tok, "Putim longpela klos bilong yu na bihainim mi." Pita i tok, "Nau mi save tru, Bikpela i bin salim ensel bilong en i kam, na em i kisim mi bek long han bilong Herot na long olgeta samting ol lain Juda i tingting long mekim." Aposel 12.5,7-8,11*

Ol Kristen i PREA STRONG TRU na God i mekim bikpela mirakel na rausim Pita long haus kalabus.

Jisas em i Papa bilong dispela gaden yumi wok long en. Em i no save tok, "Mi yet mi God" na i no save prea gut. Nogat! Jisas i save givim moa taim long prea na em i save winim birua na olgeta kain spirit nogut i save lusim man ranawe i go. Yumi ken kisim pasin bilong Jisas na wok wantaim planti prea.

Tenkyu tru long prea bilong yupela na han yupela i givim. Hia em sampela nius bilong wok misin.

## IS TIMOR



- Mike na Mangen i lukluk long sios long Borai.
- Cornelius na Julina i lukluk long kongrigesen long Vatuanau na Manukabia.
- Beatrice i lukluk long kongrigesen long Ediri.
- Amende i lukluk long kongrigesen long Loes.

### Borai Sios

Nogat inap spes long olgeta manmeri i sindaun long hauslotu na ol i save sanap ausait. God i helpim na mipela i skruim hauslotu olsem 3 mita na nau olgeta i ken sindaun insait na mekim lotu.



Mi save autim Tok bilong God long tupela Sande long wanwan mun na ol evangelist mi save trenim ol i save kam autim long tupela Sande. Manmeri husat i save stap tru long Borai sios em 15-20 manmeri.

## Felosip Grup (cell group)

Long Borai sios mipela i gat ol felosip grup we mipela i save lotu long wanwan haus bilong famili husat i save kam lotu long Sande.



Ol lain husat i go pas long helpim sios long Borai em Salastino, Juvinal na Nathan. Meri bilong Salastino na Nathan i helpim wok long kindergarten (ol liklik grup bilong pikinini).

God i helpim na ol manmeri long sios Borai i stat long luksave long Tok Tru long Buk Baibel na ol i op long harim Tok bilong God. Mipela i kirapim ol long sekim tok i stap long Buk Baibel gut. Long ol husat i save rit, mipela i askim ol long ritim Tok bilong God long wanwan de na tokaut long ol famili bilong ol.

Mipela i tingting long kirapim prea grup bilong man na meri na tu long toktok long ol samting ol i no klia. Em i wanpela nid tru na yupela i ken helpim long prea.

## Plen na tingting bilong sios long Borai

Mipela i wok long prea na plenim inap ol asples i ken kamap papamama long dispela sios na ol i ken kamap wanpela gutpela piksa namel long ol famili na komyuniti. Mipela i gat 3-pela evangelist, tupela meri i helpim long kindergarten na mipela prea long wanpela o tupela moa Sande Skul tisa. Wantaim ol Yut na ol liklik pikinini, mipela i laik bai ol i ken kisim gutpela save tru long Tok bilong God na ol i no ken i stap insait long kalabus bilong animism bilip.

## Joseph Garima Famili

Long las miting, God i helpim na tupela brata Joseph na susa Kupil Garima bilong Not Simbu i putim han i go antap long mekim wok misin wantaim tupela liklik gel na boi. Mipela i askim yupela long prea wantaim mipela long trening tupela bai i kisim. God i ken

helpim tupela na tupela inap lainim ol samting gut bipo long tupela i ken go.

## NABIRE – WES PAPUA

*Sapos Bikpela i no wokim haus, ol kamda i wok nating. Sapos Bikpela i no lukautim wanpela taun, orait ol wasman i was nating. Buk Song 127.1*

Sapos i nogat sapot, givim, beten na man long karim gutnius i go, olsem wanem ol manmeri na pikinini bai harim na bilip long dispela gutnius? Yumi laik tenkyu long God i save singautim na yusim manmeri nating olsem yumi long mekim wok bilong en. God i ken strongim bilip na blesim yupela olgeta long sanap wantaim mipela long mekim dispela wok bilong en.



Stat long Jun 2017, God i opim wanpela dua namel long Baptist Sios long Papua na mipela famili i save go autim Tok bilong God long olgeta Sande i kam inap nau. Ol lida bilong dispela sios i save sanap wantaim mipela. Sinia pasto bilong ol i amamas long mipela i ken helpim sios bilong ol, na tu em i tok em bai i toksave long skul bod bilong ol inap mitupela meri i ken skulim Inglis long Baibel kolis bilong ol tu.



Kalibumi Kongrigesen i bin stap bilong ol yet, long wanem, i no bin i gat pasto inap long 3-pela mun na mi save i go holim lotu wantaim ol. Pasto bilong ol i bin i gat hevi na em i bin lusim ol.

Taim mi save i go sindaun wantaim ol brata long harim hevi/wari bilong ol, susa Baba tu i save sindaun wantaim ol susa long kaunseling.



## TENKYU NA ASKIM POIN

### Is Timor

- Tenkyu long God i helpim na ol manmeri i op long Tok bilong God.
- Tenkyu long wok i kirap long sios long Borai.
- Prea long God i ken blesim wok long Is Timor.
- Prea God i ken strongim famili Kaire na tim.

### Nabire

- Tenkyu long God i blesim wok.
- Ol Kalibumi kongrigesen i ken ai op long Tok.
- Prea long ol Baibel skul sumatin na staff
- Prea long visa bilong mipela famili, God i ken helpim mipela long kisim gen.
- Prea long skul bilong Binosi

## INLAN MISIN

Yumi laik tenkyu long God i wok long opim planti dua insait long PNG inland misin bilong yumi. Planti ol bratasusa i lusim laip long mekim dispela wok.

- Prea, God i ken strongim ol.
- Yumi laik prea long wok misin long Wes Papua boda, Kiunga, Tari, Enga Provins, Manus, Milne Bay, Buka, Green River long Wes Sepik, Wabo long Kerema, Rabaul, East Sepik na planti ol arapela ples i wok long op yet. God i ken strongim bilip na moa yet strongim bodi bilong ol long mekim dispela gutpela wok.

Jisas i promis pinis, olgeta manmeri i harim gutnius taim bai las de i kamap. (Mt 24.14). Yumi Was, Wok na Wetim em.